

Mir schwätze Platt

Mundart

Die Kiersche

Et es schon länger als vierzig Jahr her, on alles en Hoschem wor noch e besje annerst als heut. Awer manches em Lewe vergißt mer net, egal wie alt mer wird. Su wor dat och met denne Kiersche. Mir wore, wie su oft, sonntags nohmittags an de Rhein schwimme gange. Dat wor dohmols unser Sonntagsvergnüje, doh hat sich die ganze Hoschemer Jugend getroffen. Wo sollt mer och hinginn, et gohf noch kei Disco, on Geld hatte mer och keins. Et gohf zwar bei Ries sonntags Kino, dat hat nur 1 Mark gekost, awer die hatte mer och net emmer. Jedenfalls han mir iwverlähscht, wat mer noh dem Schwimme noch anstelle gönnte. Doh meint dä Robert, meine heutige Schwager: "Ich weiß, wo schöne Kiersche stinn. Wer gieht met, Kiersche klaue?". Dat Streichs Gertrud, dä Brümmendorfs Rolf, dä Stolle Robert on ich han uns dann verabred. Also heim, omzehje on ab dä Berg eroff bes off die Wiss onner dem Altenberjer Hof. Doh stonde wirklich Kiersche wie gemohlt - deck on schwarz. Mir wohre noch net ganz an dem Baum dran on wollte anfänge ze plücke, doh schreit dat Breidbachs Emma aus der nächste Heck: "Pitter, mir hann se - hei senn sel!" Du lewer Gott, doh wohre vor uns schon annere an denne Kiersche, on die Breidbachs lohche jetzt off der Lauer, om die ze erwesche. Dohbei wore mir doch wirklich et ihrschte Mol doh ohwe! Mir senn ab, jeder en en annere Richtung, nur fott. Mir senn gerannt om unser Lewe. On ich hatt mein ihrschte Pumps an, weiße Leineschuh mit kleine Absatz dran, on dozoh e weiß Leinejäckche, dat hatt die Tante mir aus nem Betttoch genäht. On dohmet ben ich mette em Altenberjer Hofer Wäldche en en Bombe-

trichter gefalle, die gohf et dohmols nämlich noch iwverall. Jedenfalls ben ich doh dren leije gebliwwe, platt off dem Bauch, bis et dunkel wohr. Noch emmer wohr von weitem dem Breidbachs Pidder sein Stemm ze hie: "Wenn ich die krehn, ich schlinn se kapott!" An Arm on Bein zitternd, bin ich wirklich of Hänn on Föhß durch e Kornfeld gekroch on vill ze spät heimkomme. Die Schoh kapott on dat Jäckche dreckisch, von denne drei annere hann ich nix mie gehiert on gesehn. Awer wat e Glück, Vadder on Modder wohre beim Ries em Kino!

Die Uma hat mir die Dür offgemacht on versproch, nix ze verrohete. Se wollt mir sugar dat Jäckche wäsche, die gohde Frau - die wohr och später noch öfter mein Verbündete. Jedenfalls ben ich ganz erlost en mei Bett gefalle, su gohd hann ich lang net mie geschlohf. Meiner Modder hann ich annere morjens irjendwat erzählt. Gott sei dank, dat wohr noch e mol gohd gange. Denkste: Als ich ohmends von der Arbeit heimkohn, ich war jo dohmols schon in der Lier, sohß meiner Modder ihr Freundin bei ons en der Küch. Doh soht die ganz scheinheilig: "Weißt de, Maria, em Dorf erfährt mer su manches. Doh hätte gester ohmend doch e paar junge Leut dem Emma die Kiersche geklaut, se wären sugar erkannt wohre!" Dohbei guckt die mich an on grinst. Mie hat die net gesoht, awer mei Modder hat direkt geschalt, dröht sich om und haut mir e paar rechts on links henner die Uhre. Su schnell konnt ich gar net gucke! Die hat nie lang gefackelt, ons Modder. Su klein dat Marie och es, et hat emmer en gohde Handschrift gehat. Awer der ihr Freundin hätt ich könne vergefte, dat hann ich der lang net vergeß. On Kiersche han mir dohnoh trotzdem widder geklaut.

Die Lederbohx

Wat ich hei erzähle, wor etliche Johre später. Och su e Steckelsche Erinnerung, wo mer oft dran zereckdenkt. Vor allem, weil dat heut ze Daach garnet mie möchlich es. Wer gieht dann heut noch en dä Rhein schwimme? Jedenfalls wore mir sonndaachs ohmends ihrscht bei de Ries en et Kino, en Film gucke. Anschließend sen mir dann meistens en der Wirtschaft beim Ehle geland. Doh kom dann emmer en ganze Kluge zesamme. Su wor dat och an dem besaachte Ohmend, et wor en dolle Stimmung. Noh etliche Biercher hat dann einer die Idee gehat: "Auf, mir giehn jetz all en de Rhein schwimme - nackisch!" Mensch, wie romantisch, naachts om 12 Uhr, bei herrlichem Wetter, on dann noch nackisch! Dat mohß mer erlehft hann. Die ganze Bande wor hellowf begeistert. Ich glauwe, dat wor dä ruht Karlins Häns, dä heut en Schottland lehft, dä die Idee gehat hat. Awer bitte, alles wor ganz sittsam: Männlein on Weiblein schön getrennt - on eren en dat Wasser. Wie mir grad all dren wore, kimmt doh en einsame Gestalt dat Treppche ronner on guckt vorsichtig hin on her. Mir han schon Ängst gehat, dat wär en Spanner. Doh marschirt dä - wie e wor - en voller Mondur en et Wasser. Dat wor dä Stolle Robert. Dä wor ons nohkomme, awer ä woßt jo net, dat mir all nackisch wore. Meine Robert stand nau mit ner lederne Seppelbohx bis iwver die Trähjer em Rhein. Mir hann Träne gelacht: die Bohx es emmer länger wore, dat Leder emmer härter. Meine Robert woßt garnet mie, wie ä die Bein stelle sollt! Mir lache als heut noch dohdrüwver!. Deheim hat dä Robert die Bohx en de Keller gehängt, die hat dä nie mie angehat. Ich glauwe, dem sei Modder weiß bes heut noch net, wat met der Bohx passiert wor! Vielleicht liest se joh die Geschichte. Awer heut, mit fast 60 Jahr, kann dem Robert joh nix mie passiere!


● **Resi Meinhardt**

Bäckerei - Konditorei

Schmudermaier

täglich ein großes Brot-Sortiment –
täglich frischer Kuchen
ständig frische Brötchen

natürlich mit Natursauer
meisterlich gebacken



KOBLENZ, Emser Str. 382 + Horchheimer Höhe 18
Telefon 7 62 37

KOBLENZ, Altengraben 9
Telefon 1 65 27